

Kitaani ukiukkut aaffanniartarnerup januarip 15.-iat aallarnerfigalugu martsip 15.-iat ilanngullugu ingerlanneqartartussanngorlugu Naalakkersuisut Aavernik illersuineq piniarnerlu pillugit Namminersornerullutik Oqartussat nalunaarutaat nr. 20, 27. oktober 2006-imeersoq-p allanngortinneqarnissaannik peqquneqarnissaannik Inatsisartut aalajangiiffigisassaattut siunnersuut
(Saqq. Inatsisartunut ilaasortaq Nikolaj Jeremiassen, Siumut)

pillugu

Aalisarnermut Piniarnermut Nunalerinermullu ataatsimiititaliap

ISUMALIUTISSIISUTAA

Siunnersuutip aappaassaaneerneqarnerani saqqummiunneqartoq.

Ataatsimiititaliami suliaqarnermi ilaasortat uku peqataapput:

Inatsisartunut ilaasortaq Nikolaj Jeremiassen, Siumut, siulittaasoq
Inatsisartunut ilaasortaq Karl-Kristian Kruse, Siumut, siulittaasup tullia
Inatsisartunut ilaasortaq Saxtorph Didriksen, Siumut
Inatsisartunut ilaasortaq Knud Kristiansen, Atassut
Inatsisartunut ilaasortaq Aqqaluaq B. Egede, Inuit Ataqtigiit
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Hans Enoksen, Partii Naleraq

UPA 2014-imi ull. 8. maj 2014 siullermeerereernermi siunnersuut Ataatsimiititaliap misissorpaa.

Siunnersuutip imaa aamma siunertaa

Namminersornerullutik Oqartussat nalunaarutaat nr. 20, 27. oktober 2006-imeersoq allanngortinneqassasoq siunnersuuteqartup kissaatigaa, taamaalilluni Kitaani ukiukkut aaffanniartarnerup januarip 15.-iat aallarnerfigalugu martsip 15.-iat ilanngullugu ingerlanneqartartussanngorlugu.

Aaffanniartarneq atuuttoq ull. 1. marts aallarnerfeqartartoq ulorianartorsiortitsisinnaasartoq siunnersuuteqartup innersuussutigaa, piniartummi aaffanniartarnerlu avammungaatsiarsuaq angalasaruaqartarput, aarrit ukiup taamaalinerani siku malillugu ungasittumut pereersimasaramik. Piniarnerup aallartittarfiata siuartinneqarnera, piniarnerup sinerissamut qaninnerusumi ingerlanneqalersinnaanerani kinguneqassaaq.

Siunnersuutip Inatsisartuni siullermeerneqarnera

Siullermeerinerup nalaani partiit amerlanerussuteqartut siunnersuummut tapersersuipput, kiisalu Siumut allannguutissatut siunnersuummik imaattumik saqqummiussivoq:

Kitaani ukiukkut aaffanniartarnerup januarip 15-iat aallarnerfigalugu apriliip 30-iat ilanngullugu ingerlanneqartartussanngorlugu Aavernik illersuineq piniarnerlu pillugit Namminersornerullutik Oqartussat nalunaarutaata nr. 20-p, 27. oktober 2006-imeersup allanngortinneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

Siunnersuut aamma allannguutissatut siunnersuut Ataatsimiititaliami suliarineqartussatut innersuunneqarput.

Ataatsimiititaliap siunnersuummik suliaqarnera

Kalaallit Nunaanni aarrit uumasogatigiiaanut pingasunut aggulunneqarnikuupput (Kitaata avannaani, Kitaani Tunumilu), Kitaanilu aarrit Canadamik/Nunavummik avisseqatigiissutigineqartarput.

Uumasogatigiiaat amerlassusaasa ikiliartornerat 1998-imi ataatsimut isigalugu killilersuinissamik iliuuseqarnissamut pissutissaqartitsilerpoq, tamannalu 2006-imi Aavernik illersuineq piniarnerlu pillugit Namminersornerullutik Oqartussat nalunaarutaannik nr. 20-imik, 27. oktober 2006-imeersumik malitseqartinneqarpoq. Tassunga atatillugu pisassiissutit, taakkulu saniatigut maleruagassat, piffissaq piniarfik aamma piniartarfiit atuutilersinneqarput.

Killilersuinikkut aarrit pisarineqartartut amerlassusii ikilipput, tamannalu ataatsimut isigalugu uumasogatigiiaat ineriartornerisa aalaakkaalernerannik siuariartornerannillu kinguneqarpoq. Taamaalilluni Kitaani uumasogatigiiaat marluuit siuariartornerat misissuinikkut maluginiarneqarsinnaasimavoq, tamatumuunakkullu pisassiissutit amerlassusiannut atatillugu uumassuseqarnikkut inassutigineqartut (2009-mi, 2014-imi) qaffariaateqarnissaat periarfissaasimavoq. Tamanna pissutigalugu killilersuineq iluatsilluarsimasoq isumaqarfigineqarpoq.

Isumalluutiniq uumassusilinnik atuineq piujuartitsineq tunngavigalugu ingerlanneqassasoq ataatsimut isigalugu pingaaruteqartuusoq Ataatsimiititaliaq ataatsimut isigalugu isumaqarpoq, isumalluutillu piffissaq ungasinnerusoq tunaartaralugu piujuartinnissaat kinguaassiorsinnaanissaallu taamaalilluni qularutigineqarsinnaassanngitsoq.

Peqatigitillugu pisassiisarnermik sinaakutissat inuussutissarsiutigalugu piniartut suleqatigalugit tunngavilersorneqarnissaat Ataatsimiititaliap pingaaruteqartutut isigaa, taamaalilluni uumassuseqarnermik siunnersuutaasunit killiliussat iluanni isumalluutit

uumassusillit isumatusaarnerpaamik ukiullu qanoq ilinera apeqqutaatillugu atorneqarsinnaaner at periarfissaalissamat. Tassunga atatillugu nunap immikkoortuini (soorlu sikuusarneranut) pissutsit isumaliutunut ilaatinneqartariaqarput, taamaalilluni aamma isumannaallisaanermi illersorneqarsinnaasumik piniarnerup sunniuteqarluartumik ingerlanneqarsinnaanera pilersinnaassamat.

Siunnersuutip uuma siullermeerneqarnerani Kitaani siunissami aarrit piniagaanerinut piffissaliussaq 15. januarimiit 30. aprilimut pisussanngorlugu aalajangerneqassasoq Siumup siunnersuutigaa.

Ataatsimiititaliami amerlanerussuteqartut allannguutissatut siunnersuut tapersorpaat, siunnersuutikkummi Kitaani (najukkami) piniarnermut periarfissaviusunut piniarsinnaanermut piffissaliussap naleqqussarnissaa periarfissiuunneqarsinnaamat.

Ataatsimiititaliami amerlanerussuteqartut isumaqarput, piffissaq sivilisunerusoq tunaartaralugu uumasut piujuartitsineq tunngavigalugu atorneqarsinnaanerannut piniarsinnaanermut piffissaliussap allanngortinnera aarleqqutissartaqanngitsoq, allannguutissatummi siunnersuutikkut pisassiissutit allanngortinneqassanngillat, taamaattumillu aarrit pisarineqarsinnaasut amerlassusaat allanngortinnagit aalajangiuisimaneqassasut. Peqatigitillugu Ataatsimiititaliaq isumaqarpoq, uumasut pinngortitap nammineq illersortarai, tassami sikumut silallu pissusaanut pissutsit piniarsinnaanermut periarfissat killilernissaannut ilapittuutaasarmata.

Ataatsimiititaliap inassutai

Ataatsimiititaliami amerlanerussuteqaratut Siumumit, Atassummit aamma Partii Naleqqamit inuttallit **Siumup allannguutissatut siunnersuutaa akuerineqassasoq inassutigaa:**

Kitaani ukiukkut aaffanniartarnerup januarip 15-iat aallarnerfigalugu apriilip 30-iat ilanngullugu ingerlanneqartartussanngorlugu Aavernik illersuineq piniarnerlu pillugit Namminersorerullutik Oqartussat nalunaarutaata nr. 20-p, 27. oktober 2006-imeersup allanngortinneqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

Ataatsimiititaliami ikinnerussuteqartut Inuit Ataqtigiinnit inuttaqartut siunnersuut pillugu ima oqaaseqarusupput:

Ilisimatuussutsikkut paasisat, ileqquusumik ilisimasat tunngavigalugit aamma nunanik tamalaanik isumaqtigiissuteqarneq naapertorlugu isumalluutini

uumassusilinnik piujuartitsineq aamma aqutsineq Inuit Ataqaatigiinnit pingaartitaalluinnartuupput.


Piffissap ingerlanerani uumasut ikiliartorfigisaanni Kitaani aaveqatigiit marluit amerliartortut misissuinerit takutissinnaasimavaat. Piffissaq piniarfiusoq piniarfillu, aamma pisassiisarnerup malittarisassallu atuutilersinneqarnerat taamaalillutik aamma iluatsitsiffiulluarsimapput, tamatumalu kingorna aarrit qassit pisarineqarsinnaanerannut atatillugu uumassuseqarnikkut inassutit annertusisinneqarsinnaanerat arlaleriarluni periarfissaasimavoq.


Siumumit allannguutissatut siunnersuut Inuit Ataqaatigiit ilalernerqarsinnaanngilaat, uumasut ajunngitsumik suli ineriartornissaannut, kiisalu piaqqiornermi eqqissisimatitsinissamik tunngaveqarnermut allannguutissatut siunnersuut mianernartortaqarmat. Tassunga atatillugu Naalakkersuisut akissuteqaataat Inuit Ataqaatigiit innersuussutigissavaat, tassami aarrit nulusarnerat januarimiit aprilimut pisartoq tagginneqarmat. Taamaalilluni nulusarnerup nalaa tamakkerlugu aaffanniartarneq allannguutissatut siunnersuutikkut siunissami periarfissinneqassaaq.


Inuit Ataqaatigiit piniartarnermik piffissaliussap allanngortinneqarnissaa akerlerinngilaa, isumaqarlutilli isumalluutinik aalajangiisarnermik oqartussaaneq akisussaanerlu, kiisalu piniakkanik uumassusilinnik nakkutilliilluni aqutsineq ukiup nikerarneranut nuna tamakkerlugu naleqqussagaq Naalakkersuisut salliutillugit ingerlatissagaat. Inuit Ataqaatigiit peqatigitillugu isumaqarput, piniartarfittut piffissaliussat aallanngortinneqarnissaannut aalajangiinissaq sioqqullugu atuisut ilisimasaat misilittagaallu ilaatinneqartariaqartut.


Ataatsimiititaliami ikinnerussuteqartut qulaani taaneqartut tamanna tunngavigalugu aalajangiiffigisassatut siunnersuut aallaqqaammut taama isikkoqartillugu aamma Siumumit allannguutissatut siunnersuut **itigartinneqassasut inassutigaat.**

Taamatut oqaaseqarluni isumaliutissiissummilu allassimasutut paasinnilluni Ataatsimiititaliap siunnersuut aappassaaniigassanngortippaa.



Nikolaj Jeremiassen,
Siulittaasoq



Karl-Kristian Kruse,
Siulittaasup tullia


Saxtorph Didriksen


Ane Hansen


Hans Enoksen


Knud Kristiansen


Aqqaluaq B. Egede